

《實證分析：唔關我事！》

防止學生自殺委員會發表咗最終報告，吳局長講咗有實證指學生自殺同教育制度有關，咁究竟同乜嘢有關呢？我哋「家長同盟」嘗試從報告內容找線索（括號內「」吳局長原文引用，*** 家長同盟回應）……

1. 「當局在 2012 年至 2015 年間檢討了新學制，所提出的各項建議將分 階段實施，以優化新學制。建議措施旨在減輕學生的學習壓力和教師的工作量，從而穩定學校生態，以利教師專注 教學和輔導學生，同時維持整體課程架構和公開考試評級機制。從問卷調查結果可見，學校對有關措施給予正面評價。」

***嘩！well done，原來當局咁勁，已經懂自我完善，唔怪得唔關佢事啦。

2. 「有部分學校已修改他們的教學時間表，以確保學生 面對的學習壓力不會過大。」

***部分即係幾多間？十幾廿間？夠一成嗎？Happy School 是也？希望遲 d 出生率下降吾駛縮班殺校喇。

3. 「部分委員認為取消系統評估（TSA）可減輕學生的壓力。委員知悉系統評估的檢討已展開……」（所以不多說）

***Okok，隔離委員會嘅嘢唔好議論咁多，就算覺得唔妥，都係各自為政好！

4. 「建議教育局應更積極鼓勵學校分享和推廣有關學與教策略、家課及評估政策的良好做法」

***嗱嗱嗱……唔只係家長同盟講㗎，「真。全日制訴求：公開及質量並重的家課政策」！但當局早就出咗指引喇，有效咩？唔敢監管又可以點樣「更積極」呢？！

5. 「專上學生未能妥善應付壓力的主要原因之一，可能是中學以至 整個教育制度只強調學業成績和應付考試，而忽略了個人、 社交及職業方面的發展。委員認為長遠而言，教育制度應促進學生的全人發展」

***矣？又話同制度無關？我哋嘅教育係「求學不是求分數」但升級入學就只是看分數！唔只係 DSE 呀，升中分 banding 都係㗎。

6. 「為減輕文憑試對學生所構成的壓力，有意見認為 有關方面應提供更多公帑資助學士學位課程學額。」

***一年萬五個學位約廿%考生可以讀大學，自命知識形經濟社會嘅香港係咪夠？唔緊要，

仲有副學仕嘛，畢業（失業）後慢慢再還 Grant Loan! 現在還可以北上升學噢!

《家長有責，豈只守門口？》

嘅然報告話學生自殺唔關教育制度事，咁到底邊個要預飛呢？依啲咁和諧嘅委員會當然唔會得出要有乜嘢人要負責嘅結論喇，於是就出咗「教育局應為學生身邊的人包括教師、朋輩、大學人員及家長提供『守門人』訓練」依啲建議，即係話大家一齊預？定係大家嘅責任就等如冇人要負責咁呢？

「為家長提供『守門人』訓練，介紹正面親職技巧的教育計劃」

***真心講，身為父母既家長點只係「守門人」？更加要係「守護人」！學習點樣分辨高危、處理精神問題當然緊要，但依啲都係被動等子女已經出咗問題有徵兆嘅嘢。點解我地唔可以主動啲去防止依樣既事發生？

「人際關係問題則主要由於家庭支援不足、與父母難以溝通」

***我哋為人父母每日投放咗幾多時間去關心子女？有冇多過放喺玩手機度？我哋係子女嘅支持者定其實喺壓力來源？要尋死或者有精神問題嘅肯定早有先兆，但家庭關係疏離又點能夠察覺、處理？身為家長組織，我哋自覺責無旁貸。

「部分家長不接受升讀大學以外的升學和就業選擇，增加了學生的壓力。」

***有人話香港升學就業出路單一，依個係社會嘅錯。咁我哋係咪就有選擇呢？了解子女嘅需要同性格去同佢哋一齊計劃適合而且佢哋樂意走嘅路；定係按照社會標準、父母一廂情願嘅願望去強加子女身上呢？以現實為理由去強迫自己子女嘅，同有自殺傾向嘅人一樣都係自閉門戶，拒絕出路。

「委員認同一個家庭友善的環境確實能促進親子關係。然而，部分委員認為標準工時等的議題已超出委員會的職權範圍。」

***社會嘅錯又點會只係限於出路少啦，香港人生活壓力大、居住環境狹窄、工作時間超長等都係直接影響親子關係嘅元兇。人在江湖嘅苦處我哋身為在職父母嘅當然身同感受喇。但就係因為親子時間已經少，我哋更加要珍惜，唔好每晚返嚟就只係識得問功課做完未，放假就做帶佢去補習興趣班。

「學校應繼續與家長建立緊密溝通，並加強現行的溝通渠道，讓家長就校本政策和措施，例如家課及評估政策等，提出建議及查詢。」

***依點我哋家長同盟講咗好耐喇，但要建立合適嘅家課評估政策唔係學校肯透明公開就得，更加重要係家長能夠勇於發聲，發表意見為自己嘅子女把關，一齊建立一個健康快樂嘅校園。唔好淨係識得呻，到要提出表達意見時嘅時候就連校名都吾敢講。喺 Facebook 上大大聲，對住學校就唔出聲。

「學校及/或 家長教師會亦宜向家長提供培訓，加強家長對 學生學習及發展需要的了解。」

***家教會有理由只係一個康樂活動義工中心，佢嘅基本職能就係為促進家校合作同溝通，從而改善學生學習生活。「家長同盟學校選舉團」嘅成立就係要推動家長進入校董會、家教會，在校內發聲。

講到尾我哋絕對明白學童自殺嘅原因複雜，更加知道身為家長實在責無旁貸。我哋會自我反省，好好關心、守護自己嘅兒女。亦都係因為家長有責，我哋更加要企出嚟為子女爭取改善成長環境。學童自殺原因眾多而且環環相扣，除咗個人因素，我哋相信教育制度同學生壓力絕對關係深遠！希望教育局能夠有所擔當，立刻全面檢討並改善香港教育制度！

香港革新教育家長同盟